



## Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1613 del 27/05/2026

As de 29 ont as de 30 van moi lemviarungen en de luft zbischn natur ont kultur

# En Bersntol der Festival LUFT!

[Mòcheno] Derbail as de bèlt gahasse laven tuat, s Bersntol lont inn za gea' lenksemer. Do de luft kimmp nèt: an innlon za hòlten se au, za gea' hoa anau, za lem s lòn ont za otnen s pet volla ling. Gea' en tol billt song gea' anaus van sperretn platz, tea' se au, riarn se. S ist a lemviarung gamòcht va otn ont presenz, bou as de identitet van plòtz kennt se tritt no tritt. Avai men kònt nèt verstea' òlla de platz pet an earstn plick: a toal hom noat va zait, òcht, turchvorn. Va de doi idea geat au LUFT! - lemviarungen en de luft zbischn natur ont kultur, an Festival as, af de 29 ont 30 van moi 2026, en Palai en Bersntol, lont inn za gea' en nèt pet en lòn.

LUFT! ist drinn en baiter projekt "De kròft va de minderhait: bideraugea' van an lòn pet taitscha burtn en sud van Alpn", unterstizt va de Autonome Provinz va Trea't unter en ring van PNRR. An ring as, en de leistn jarder, gaòrbetet hòt ver za verpessern s lem avn lòn ont ver za paun naia virn va attraktivitet, asou za hòlten de bersntoler identitet ont de sprochminderhait abia schlissl ver za riarn de tscherln ont de ben va de verpessering. Unter en doi rom vinn men de òrbet va TSM - Trentino School of Management aa, turch en Innricht Birtschòft van Turismus ont Lòntmarketing, as òrbetet ver za trong envir viar òrbetn as der rif hom za gem bèrt en de kultural, gschichtlege ont sproch lokalpahalter, no en de karaktern van tol ont va Valzegu', ont pet de riven van PNRR.

Bail en Festival LUFT! òlls dòs bart envirtrong kemmen en an program as mearera richtungen hòt. De offegen òrbetn barn turch en tol gea' pet en zentrum s riarn se ont de lemviarung, derbail der kultural programm, pet òrbetntrèffn, derzeiln ont vourtschbinnen ver de kinder ont ver de familie aa. Gèltsgott en de mittòrbet van Bersntoler Kulturinstitut s bersntolerisch ont s tea' van lait barn protagonistn sai'. De talk barn autea' ont plòtz long en temen abia s pintn se van lòn ont de pèrng, s bart hom aa an morket va hontbèrker zòmm pet de momentn ver za trèffen se ont de konzertn as barn mòchen vertraim de ta pet lust.

En dòs ist derzua de moglechkait za pasuachen a toal bichtega platz van tol - abia s Bersntoler Kulturinstitut, de austelln platz iber en de gschicht van gruam ont de Gruab va Hardimbl - as s program baitern ont gem de moglechkait za vertiavern der kontèst van festival. An innlon mear abia a vourschlog. Za hòlten se au, za schaug, ont za leing en nèt.

Do s komplet program ont de virn za nemmen toal:

[https://www.visitvalsugana.it/it/eventi-valsugana/luft-esperienze-allaria-aperta-tra-natura-cultura-24681\\_ide](https://www.visitvalsugana.it/it/eventi-valsugana/luft-esperienze-allaria-aperta-tra-natura-cultura-24681_ide)

Der trèff ist gamòcht van TSM zòmm pet de partnerschip va de ApT Valsugana, pet de zòmmòrbet van Dinst Turismus ont Sport va de Autonome Provinz va Trea't ont pet en unterstiz va de vraischòft Glow.

**Derzua s plakatl.**

**Ibersetz gamòcht van Sprochtirl va de Tolgamoas'chòft Hoa Valzegu' ont Bersntol**

(cdt)